

第一百零五冊

卷一百九十七

列傳九

卷一百九十八

列傳十

卷一百九十九

列傳十一

新纂雲南通志

盧漢題



新纂雲南通志



新纂雲南通志

卷之四
禮典
禮部
禮部
禮部

新纂雲南通志卷一百九十七目錄

列傳九

清

錢澧谷際岐

趙廷俊彭翥

袁文典文揆

師範

沙琛

劉大紳

張鵬昇

張履程李素

李文耕

卷之五

七

八

九

十

十一

十二

十三

新纂雲南通志卷一百九十七

列傳九

清

錢澧谷際岐傳

錢澧字東注一字南園昆明人錢氏之先蓋出自吳越武肅王鏐明成化中有從宦於滇者曰鑄族始西徙時中人錢能使滇以鑄同姓欲引致門下鑄內耻不爲屈逃居迤西能去復回昆明澧少有大志好學治經尤精習篤修言行以剛正自將乾隆中成進士自翰林院檢討累拜江南道監察御史居官爭議棘棘不阿舉彈無所避時甘肅省藩司詐爲振卹民饑盜取賦帑贓發自總督以下論誅逐有差而陝西巡撫畢沅獨以事後發罪不相及澧遂奏劾沅心懷姦邪前爲陝甘總督與藩司王亶望交通賂遺相爲腹心挾私罔上欲以徼

倖冒濁苟容內有不仁之性而外無忠固之情臣子之惡莫大於是
不可以爲民牧守臣請免沅官斥之遠方以正衆邪之原服吏民之
心沅坐降官三級帝初即位時自負英毅羣臣論事不中旨輒被詔
書峻責自和坤受寵任威福移於宰輔廷臣益禁齟或黨附固祿位
還起徒步以直道自任居恆清心疾惡敢搏擊貴寵臣論事切直帝
嘉其忠不以罪也當是時天下以爲賢論士之宜在天子左右者皆
稱澧和坤旣用事勢熏灼中外山東巡撫國泰者和坤客也用厚援
盜取官帑巨萬治汙暴大爲民疾苦澧上疏論劾帝詔澧與和坤按
驗國泰罪澧奉詔微服行抵良鄉會和坤遣奴馳驛傳私書之國泰
所索供辦甚急澧潛識其形居數日奴歸澧衣冠候中道吐令下騎
伏具探得姦迹和坤知謀洩懼并得罪因私過澧進輕裘爲厚謝請

更前奏澧固執不肯從奏入國泰論如法澧再遷通政司副使出爲湖南學使而和珅居中日夜媒孽其失撫細故劾逮澧左遷主事再起爲御史入直軍機處於是和珅爲軍機大臣筦總樞柄氣凌大學士阿桂上和珅朝常止內右門直廬獨署諾而大學士王杰尙書董誥止南書房尙書福長安居造辦處皆持祿養資具位而已阿桂雖日坐樞廷卒無人入謁澧以爲軍機政本自大學士以下綰樞密者皆當列坐合議大政所以集思廣益占衆從而布誠公也今大臣皆散直省署慮非祖制況內直門切近禁寢不應庭燎未煇一人入直恐爲日寢久內與常侍關通外開角立朋黨之漸有詔切責諸軍機繇此益與和珅忤而帝益重用澧常相周護屢召對因言滇省政治耗弊錢法壞亂宜以時更置大吏帝爲罷巡撫富綱官從幸灤陽衣

敝裘中寒歸而卒年五十六澧性儉約歷官京朝祇攜一力躬飯脫粟而故人族戚仰衣食者祿入多給之家無餘財善爲詩古文辭工畫馬又喜書隸雖其零縑短紙落筆爭爲人藏皮初澧督學湖南歲大饑旱巡撫陸燿以祈雨中熱卒代者至方生日張樂稱慶或以告澧澧曰故巡撫方以死勤事今詎公等稱慶時邪巡撫懼而止澧氣貌端凝不苟言笑朝列深嚴憚之自大學士阿桂以下皆呼南園先生而不名云

袁文揆撰別傳 程含章撰墓誌 李元度撰事略 清史稿

谷際岐字西阿趙州人其先明都兵指揮原一居合肥洪武世從黔寧王將兵徇滇遷趙州之景東衛世以其地多谷氏更稱曰谷旗營子孫以田爲業至際岐祖思勳始發憤讀書補州學官弟子以儒行推重爲鄉祭酒際岐舉進士第乾隆中授翰林院檢討預校四庫全

書禮闈分校以親年老求歸供養總督富綱高其才聘主五華書院
滇之習經藝爲舉子業者皆以際岐爲師遭父喪扶櫬歸故里十年
不出嘉慶初起爲福建道監察御史際岐爲人剛正嚴毅有重名帝
甚任之是時教匪訐川楚間趨悍虓豁勢動中原百姓奔走相蹂躪
諸將用兵先後三載皆無功而賊益獮不可遏際岐以禍起守令務
治刻深法令煩僭督撫大臣附下罔上苟事周容交爲姦利欲奏罷
一二疆臣以立紀綱因具爲文誓告天地神祇於是舉劾陝甘總督
宜綿陝西巡撫秦承恩等曰按宜綿等奉詔討賊仗節秉鉞龔行天
罰于今三年效蹟不著淫縱無度糜餉千萬士無半菽之飽兵驕將
怯師徒撓敗猶復虛報首虜關通樞軸陛下聖德含弘宜綿等有罪
未伏重誅尸居高位無恐懼心昔先帝當緬甸之役雲貴總督楊應

琚貪功諱敗檻車逮京師賜自盡天下以爲天子明見萬里之外即
近之德楞泰胡齊崙之蝕餉均下吏籍其家此誠陛下所當法效宜
綿等放命敗度失大臣體不可以帥三軍武昌府同知常丹葵邪枉
貪汙御下束濕爲淵鰈魚甚諄治道教匪本陛下赤子挺而走險亦
鼠竊烏合之徒耳而丹葵專斷作威賊殺無辜乃凶於而國不法之
大者書曰至於再三有不用我降爾命丹葵奉職無狀罪在罔赦宜
付刑辟以儆無良臣謹上劾宜綿等坐降黜有差遷禮科給事中滇
迤西道故饒鹽井利自康熙間守令歲以時均輸售之民以佐國賦
積久吏因爲姦民初生子女即算口緡其疾病死者雖閱數十年而
賦不蠲縣官售民鹽多雜砂土味苦至不堪食又牛一算稅抵丁口
三其牛旣售則并稅兩家錢至是民苦暴征頗流亡轉徙他鄉鹽賦

無以贍乃更配徙旁郡民夫彊令納緡率夫銀三兩而一算小民窮
愁破家敗業以應吏供尙不能相救則往往殺吏役以紓忿怨上方
納疆吏奏議嚴誅亂民而不問吏盜姦事以是吏縱橫益甚際岐上
疏請禁吏役作奸叛亂自止帝寤始下詔禁革而當事者或沮其議
其後初彭齡撫滇彭齡故際岐門下士始禁官擅鹽利縱民自煮輸
銷遠近滇民紓息會有兩湖總督陳輝祖之廝役蔡永清雄殖貲產
喜交納公卿用厚援進官秩五品際岐舉奏其狀曰臣聞卑高以陳
貴賤定位國家之興尊賢而敬德爵列上下之序王道綱維春秋之
義賤不陵貴小不加大所以敬防僭愆也永清廝卒下賤怙財依權
交通朝貴濫竊朱紫無尺寸之功而冒爵秩之寵大學士慶桂尙書
朱珪知過不舉貪取貨賄假託天憲官授惟私長邪諂墮國體亂朝

廷之紀不宜處位臣請悉罷慶桂等官以示天下於是帝下尙書九卿雜議褫永清職珪等詔責有差上以爲慶桂不暱永清廷臣希旨際岐坐詆毀大臣所舉劾不當左遷刑部郎中例出爲知繁缺府事因謝疾歸居揚州主講梅花書院凡五年卒年七十六所著書有五華講義大儒詩鈔共數十卷行於世

包世臣撰家傳

贊曰當乾隆之末和珅秉政自張威福朝士能耻趨其門下以希進用者已可貴矣若夫立論侃然訟言其失於章奏者錢澧一人而已桐城姚鼐數稱歎澧其言如此際岐廉公有威捧簡待旦不避彊禦峻操貞行臺閣生風詩所謂剛亦不吐柔亦不如者二子之謂乎

趙廷俊彭翥傳

趙廷俊字特選號秀峯太和人十世祖瓚明弘治中官兩淮鹽運副

使卒祀鄉賢數傳而至廷俊之祖履名有善行子東美仗義如其父
早卒次尙美生廷俊而爲東美後尙美卒哀毀骨立夜讀書兩母側
機聲書聲相應和達旦戊午補郡弟子員甲子以第三人舉于鄉乙
丑成進士歸班候銓值總督巡邊上嗣母守節狀得旌如例兩母先
後卒廷俊廬墓授徒旦夕哭三年如一日服闋銓授陝西宜川縣縣
城西有銀川河夏秋水暴注如激矢嚙城根將圯廷俊捐俸築石堤
五百餘丈以護城邑僅宜麥則開渠納水教民種稻粒食始足以治
行最移襄城見城垣頽毀曰前者宜城之役特補苴耳此非其倫也
宜用土七灰三法復捐俸治之堅於砥石省帑金四萬得旨優敘擢
漢陰通判漢陰地少蓋藏廷俊禱雨應年穀大有乃乘時倡積貯捐
俸買穀紳民佐之分儲四鄉得萬四千餘石創立義學十餘所大吏

知廷俊賢調署寧羌州州以青桐葉飼蠶廷俊曰不如柅因教之種
柅而繭良民利之有習白蓮教者善勸之而悔因畫地作十字使步
其上胥化爲良民權留壩同知擢權漢中府縣有蝗禱於神蝗徙不
爲災癸巳天子飭疆臣舉循吏巡撫以廷俊薦擢留壩同知入境見
前勸民所植桑皆蔥茂成林與父老相顧而喜鄰邑鳳縣民好訟越
境訟於廷俊廷俊取陳文恭宏謀所輯訓俗遺規反覆諭之其人輒
悔悟去甲午擢知新安府雪中度鳳嶺鳳人爭擁肩輿以進至鳳縣
供張大備卻之不可曰使君惠我多矣抵新安見案牘山積力爲剖
決數月遂無留牘焉初漢水溢入民田皆沙礫不可種稻惟包穀爲
宜廷俊教以樹藝之方歲乃倍穫再權漢中值襄沔諸邑水捐俸賑
之三載以公罪被議去官士民如失慈父母而廷俊怡然歸滇享林

泉之樂者十三載其不以仕止得失爲榮辱蓋如此廷俊篤於天倫身備六行從兄孝廉殿選卒於京廷俊計偕時負其骨以歸後數年戚胡效川孝廉亦死都門復爲輿櫬而致之滇乙巳迤西漢回閩有邀廷俊議團練者廷俊爲言利害寢其議回人聞之感且悅自是無疑貳平居訓子弟必孝必恭後生游庠序者時訓以立身行己不僅講解文藝已也生於乾隆三十八年卒道光二十九年享年七十有

七

林則徐撰
墓誌銘

彭翥字南池蒙化人祖母蘇氏趙州人有蘇霖渤者爲錢澧師以清修厚德型於鄉里翥早喪母率從大母依蘇氏以故能析義理遏嗜慾雖半菽不繼不敢一介取於人日把卷聳肩讀一不染少年馳騫事舉賢書始遊京師與錢澧同對牀京邸貧甚日或易衣而出清癯

凜凜驕榮盡落一起居之必時一嘆笑之有節是時德性已堅定矣
連不得志於禮部乃以大挑例分發試知縣粵東補封川令歷五年
調任香山躬出洋梟巨盜林亞五敍功授五品服擢同知岳州當事
者仍奏調還粵檄署知瓊州專捕餘盜遂歷諸幽險備得情狀將謁
陳當事舟次陸豐而卒翥初任封川前任虧帑幾七千邑小而瘠地
連邕桂爲羣盜出入往來孔道緝治稍不力必無以安良善已而連
獲劫盜大吏抑其功慮翥欲以此自喜將形他玩盜諸州縣過翥不
以爲愠也後逐盜於海洋知信之結於民者深能必民之不我貳故
其致家人書曰吾揚帆而出海焉心知報國目乃無賊及其擊賊焉
目知有賊心乃無海此豈無所挾持而徼倖一試者乎錢澧論之曰
凡民之所以信翥者信其身之治也夙夜未嘗偷安也脂膏不以自

潤也有必平之喜怒無相市之話言也其在瓊州也日茹素不進肉味卒觸瘴癘耗心力勞瘁以致於死無子臨終力疾啓於父請以弟之子書城爲嗣

錢澧撰墓志銘
袁枚撰小傳

贊曰孔子稱道之以政齊之以刑民免而無恥道之以德齊之以禮有恥且格夫民倉廩實而知禮讓衣食足而知榮辱威禁以遏奸未若安富而保民者也若趙廷俊之勸穡修學仁信允洽所在感孚可謂能保民也已彭翥剛毅能斷樹德務滋除惡務盡斯又寬猛異濟殊途而同歸者哉

袁文典文揆傳

袁文典字儀雅保山人乾隆丙子舉於鄉一上公車不第不再赴選廣西州學正甫一載以母老乞養歸不復起其里居未嘗高踰垣閉